

## MANIFIESTU ESCONTRA LA QUEMA DESCONTROLADA

Dende les asociaciones e individuos de la sociedad civil asturiana, abaxo firmantes, queremos manifestar la nuestra condena a la quema descontrolada de montes que vien siendo recurrente nos últimos años en tolos conceyos asturianos; onde se pon en peligru tanto l'ecosistema y munches especies de fauna y flora como los propios núcleos rurales, les persones que viven nellos y les que trabayen apagando'l fueu, amás del patrimoni cultural asturianu.

Siendo conscientes de la dificultá que supón la xestión forestal nun mundu rural cada vez más despobláu y les torgues qu'esto pon pa la ganadería estensiva, consideramos qu'estes acciones nun traen más que consecuencias negatives y ponemos n'evidencia que:

1. Les condiciones climatolóxiques y medioambientales na actualidá nun faen posible una xestión forestal y del monte al traviés de les quemés. La extensión de mata, antiguamente anecdótica, güei ye un verdaderu polvorín.
2. La quema del pastu nesta época del añu, y habiendo tantes quemés siguies nos mesmos montes, tien como consecuencia la desapaición de la materia orgánico del suelu, el so empobrecimientu y la non rexeneración de la pación.

Polo qu'entendemos

3. que les quemés que se faigan han controlase y tien que desenvolveles l'Alministración, qu'ha entender que ye menester modificar y ameyorar yá la xestión ambiental d'Asturies.

Y pidimos

4. l'acotamientu de los montes comunales afectaos pol fueu.

Les alministraciones non solo tendríen que xestionar la estinción y prevención de los fueos, sinón qu'han tener un papel protagonista na concienciación social y adelantase al que yá ye un gran conflictu social nel mundu rural asturianu. D'esta manera, les asociaciones y persones abaxo firmantes ofrecémonos, na medida de les nuestres posibilidaes, a colaborar y a facer de puente p'algamar un diálogu social.

Nun comulgamos col silenciu que da impunidá a estes acciones criminales, porque pensamos qu'esti comportamientu mafiosu nun tien como oxetivu abrir pastos, sinón que son acciones que ponen en peligru la sociedad, provocando perdes humanes, económiqes y arquitectóniques (cases, cabañes y horros) y la estroza de la flora y fauna autóctono, yá de por sí vulnerable.

L'alministración asturiana tendría qu'aumentar la vixilancia, pero tamién aplicar midies que pongan solución a estes acciones, entendiendo que'l monte precisa xestionase y atendese pal aprovechamientu del terrenu y pal equilibriu d'especies monteses nel mediu natural y humanu. Pensamos que la tresformación paisaxística qu'a lo llargo de la historia sufrió Asturias pola actividá ganadera, que "creó un agroecosistema únicu que fixo posible caltener el mediu natural, cumpliendo una función ecolóxica y económica" (Izquierdo Vallina, 2013), necesita volver funcionar, onde tanto'l sector ganaderu, como tola sociedad entiendan que'l caltenimientu del mediu natural ye necesariu p'algamar esti equilibriu.

Por esto, pidimos a los Conceyos y al Principáu d'Asturies que, como nós, denuncien los fechos asocedíos, se posicionen firmemente, entamen acciones y tomen un papel activu col que se pueda acabar con esti conflictu social y ecolóxicu que consideramos de máxima gravedá.